

Lantschau l'acziun «pop romontsch»

La Dertgira nauscha ha dau sias sentenzias a Mustér

■ (anr/hh) La Dertgira nauscha ha salvau sia tschentada a Mustér ed ha sentenziun Urs Paul Engeler per quei ch'el ha titulau ils Romontschs sco «Räubers» ed «Erpressers». Pigl au-ter han ils treis derschaders tematisau differents schabetgs digl onn vargau en ed entuorn la vischnaunca. Medemamein ha ella entschiet a rimnar suttascripziuns per l'acziun «pop romontsch». Cun quella vul ella augmentar il diember d'affons en tiara romontscha. La dertgira ha constatau ch'ei dat adina pli paucs Romontschs: «Negin che vul far pops romontschs.» Las consequenzas ein evidentas, las annadas daventan adina pli pintgas, las scolas ston fusiunar. Plazzas da lavur van a piarder, stizuns ston serrar e la fin finala era l'ustria e la posta. «Ed insumma, tgi mira in di da nus, cu nus essan vegls», sedamondan ils treis derschaders. Per far ina fin a tut quels fatgs ha la Dertgira nauscha clamau en veta l'acziun «pop romontsch».

Pops drova la Romontschia

Ella fa ina proposta concreta: «Per mintga affon romontsch che vegn mess sin quest mund survegnan ils geniturs in supplement mensil per pop da 2000 francs.» Las cundiziuns persuerter ein: «Il pop sto emprender e saver romontsch. Cun 16 onns eis el obligaus da far in examen final sco controlla da sias habilitads linguisticas romontschas. Sch'il pop, respectivamein il giuvenil damogna gl'examen, astgan ils geniturs salvar quels raps, la summa da 384 000 francs. Sch'igl affon damogna buc igl examen, ston ils raps vegnir restitui.» Da gliendisdis tscheiver la sera ha la dertgira entschiet a rimnar suttascripziuns. La petiziun corrispundenta

duei vegnir inoltrada la proxima sessiun dil cussegl grond a Cuera entras il president communal Aldo Tuor.

EX07 sco plattafuorma

Per la Dertgira nauscha savess la EX07 esser ina plattafuorma per l'acziun «pop romontsch». Cheu duein veras Romontschas e vers Romontschs s'entupar per la fin finala haver success. Enstagl dil «Frar grond» ni dalla «Vusch04» ni eventualmein il «Frauentausch07» savessien ins organisar uonn la «Cigogna07» tenor il motto «Flurs ed aviuls per in e scadin». Priu sut la marella ha la Dertgira nauscha era la zona tempo 30 el vitg. Ina tala vegli dir piazza da giug per pign e grond, precedenza per paders e pedunzs, il caos programau el vitg. In avantatg hagi quella zona per il kebab. Ussa sappien ins far las empustaziuns duront carrar. Sco cumpensaziun dalla reduziun dil tempo el vitg da 50 sin 30 duei astgar vegnir carrau egl avegnir da Sumvitg ora cun 160 km/ura. In auter tema dil tribunal dil tscheiver ein las pendicularas stadas. Quella ga ei la damonda dalla neiv vegnida sin tapet. La damonda fundamentala seigi aunc buca sliigiada, numnadamein danunder prender l'aua per nutrir ils canuns da far neiv: «Nua vegness il lag? Forsa ella Val d'Uors ni savess ins trer neu l'aua dil lag Serein? Pli datier fuss denton aunc il lag da Tgauns?» Duessi ei buca reussir da far vinavon culs canuns, vegni ei buca pli ad haver num ils proxims onns Disentis 3000, mobein Disentis 0,0.

Vid la fuortga cul delinquent

La dertgira ei sedumandada daco ch'il benzin ei pli cars a Mustér che a

Rueun, ha analisau la problematica dils confettis duront il tscheiver ed ei era sefatschentada dalla Casa da tgira Sogn Gions. Buca mitschaus ei era quella ga il chor viril. Senza dirigent hagi quel entschiet a far turas e semetter sin vias puleinas. Ina varianta da spindrar la situaziun sepurschessi el vitg. Il chor viril duei surprendre il Postigliun sut il num PostViril. Suren ellas habitaziuns pudessi vegnir endrizzau in post samaritan pils stuorns ed ina alzada pli ensi in local da teoria per preparar la giuventetgna per l'acziun «pop romontsch» tenor il motto pauca teoria, bia pratica. La fin finala ei la Dertgira nauscha arrivada tier la sentenza principala. Ella ha buca sentenziau il biopur Renzo ni il musicstar Mario, mo bein *Urs Paul Engeler*. El hagi titulau ils Romontschs sco «Räubers» ed «Erpres-

sers». El hagi zuar buca scret sez quels plaid, mo «mitgegangen, mitgefangen». Urs Paul Engeler havessi fatg meglier da buca vilentar nus Romontschs. Per quei motiv vegni el vid la fuortga. La Dertgira nauscha ha terminau sia tschentada cun las ceremonias usitadas e cun il plaid final. Embelliu la sera han las musicas da tscheiver Bagordas da Mustér, Patlaunas da Breil e Fifferlottas da Segnas.

Silsuenter ei la sera da gliendisdis tscheiver vegnida cuntinuada en halla Cons cun musica, sault e divertiment. Las tractandas dalla Dertgira nauscha ein vegnidas protocolladas e surdadas als interessents per investa. La davosa pagina da quei protocol cuntegn differentas notizias pli cuortas ch'ei buca vegnidas menziunadas specialmein alla tschentada.